

Kontuola

ANTZUOLA / Egubakoitza / 2004eko irailaren 27a / 215. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Bertso-afari batekin zabalduko ditu ateak gaztetxeak, gaur, egubakoitza

AINTZANE IRIZAR


Gaur, egubakoitza, zabalduko dute gaztetxea. Inaugurazio egun horretarako, ekitaldi berezia antolatu dute: bertso-afaria egingo dute gaztetxean bertan. Xabier Silveirak, Fredi Paiak eta Jokin Urangak jardungo dute bertsoan afalostean.

Kalebarrenen, Goñi oinetako dena egon zen tokian, hain zuzen ere, jarri dute gaztetxea. Oraingo astean bertan jarri dute martxan estraktorea eta herritarrek emandako mahaiak eta aulkiak ere badituzte. Gauzak horrela, dena prest dago gaur arratsaldean ateak irekitzeko.

18:00etan, gaztetxearen historiaren gaineko bideo emanaldia egingo dute; 19:30ean, berriz, poteoa egingo dute trikitilariekin eta bertsolariekin, eta gauean, esan bezala, bertso-afaria egingo dute.

GAZTE GUZTIENDAKO GAZTETXEA

Inauguraziorako ekitaldi hauek guztiak Antzuolako Gazte Asanbladak antolatu ditu. Asanbladako kideek azaldu digutenez, oraindik ez dute zehaztu zela funtzionatuko duen gaztetxeak: "Poli-



Arratsaldean bideo emanaldia eta gauean bertso-afaria egingo dituzte gaztetxean.

ki-poliki, martxan jartzen garenean, gazte guztion artean joango gara zehazten zela funtzionatuko dugun". Dena dela, gauza bat badago zehaztuta: nahi duten gazte koadrila guztiak izango dituz-

te gaztetxeako giltzak. Bost laguneko giltza bat izango dute. Hori bai, giltzak izateko eskubidearekin batera, hainbat betebeharrak ere izango dituzte: gaztetxea garbitzea, esaterako.

Azkenik, aipatzekoa da urriaren 8an ibarreko gazte asanbladen topaketa egingo dutela Antzuolan. Debagoien osoko hainbat gazte elkartu eta afaria egingo dute.

LABUR

Haurtzaindegirako izena emateko epea zabaltzear

Datorren astelehenean, hilak 27, zabalduko dute haurtzaindegian aurrematrikulatzeko epea, eta urriaren 8ra arte egingo da izena emateko aukera. Interesa dutenek udal-letxera jo beharko dute, 08:00etatik 13:00etara, eta Jonerengatik galdetu. 0 eta 2 urte bitarteko umeendako izango da haurtzaindegia, eta Udaleko arduradunek espero dute 2005eko otsailean zabalatzeko moduan egongo dela.

Aiherratik etorriko dira ospakizunen aurkezpena egitera

Antzuola eta Aiherra anaitu zirela 20 urte betetzen diren honetan, AEK-k egiten duen antzerako korrika bat egin nahi dute. Gaur, egubakoitza, ospakizun horien berri emango dute, 19:30ean, Olanen etxean. Aiherrako Beltzuntze elkarteak ere hantxe izango dira. Antolatzaile lanean herritarrek jardutea da helburua; hortaz, interesa dutenek gaur dute hitzordua.

LEHIAKETA

Argazki lehiaketan, e-postaz bidali ahal izango dira lanak

AINTZANE IRIZAR

Udazkeneko bezala, argazki lehiaketa antolatu du Udaleko Kultura Sailak. Lehiaketa horretarako lanak aurkezteko epea zabalik dago urriaren 29ra arte. Aurten berrikuntza bat ere badakar lehiaketa horrek: lanak e-postaz bidaltzeko aukera dago.

Ohi bezala, hiru mailatan banatu dute argazki lehiaketa. 14 urtetik beherakoen maila, 15 eta 25 urte bitartekoena eta 26 urtetik gorakoena bereiztu dituzte. Lehenengo mailan, parte hartzaile

guztiendako egongo dira sariak; bigarren eta hirugarren mailetakoko parte hartzaileen kasuan, berriz, 150 euroko saria jasoko du irabazleak eta 90 eurokoa, bigarren geratzen denak.

Argazkiak 30x40 zentimetroko krema koloreko karti mehe baten gainean aurkeztu behar dira; argazkiaren tamaina egileak berak erabaki beharko du.

Argazkiak berak ez du izan behar egilearen gaineko daturik; atzeko aldean, argazkiaren izenburua besterik ez da jarri behar. Argazkiarekin batera, kartazal itxi baten barruan jarriko dira egilearen datuak.

E-POSTAZ ERE BAI

Aurten berrikuntza garrantzitsu batekin dator kiguru lehiaketa. Teknologia berrien indarra ikusita, e-postaz ere bidali ahal izango ditugu argazkiak ondoko helbidera: kultura@antzuola.net.

Sari berezia izango du e-postaz bidalitako argazkien irabazleak: hain zuzen ere 100 euro jasoko ditu.

AZAROAN, ERAKUSKETA

Azaroko lehenengo bi asteburuetan, hilaren 6an, 7an, 13an eta 14an, erakusketa egingo dute Olanen etxean, lehiaketara aurkeztu diren argazki guztiak.



liigo Alonsoren argazki honek jaso zuen iaz lehenengo saria.

SAN MARTIN AZOKA

Antzuolar baserritarrek eta sukaldariek hainbat sari irabazi dituzte San Martinetan

ANTZANE IRIZAR

Aurreko asteko zapatuan, hilak 18, Bergarako San Martin jaien barruan, azoka egin zuten, urtero bezala. Hantxe, Antzuolako baserritarrek eraman zituzten lehenengo sariak, fruten eta barazkien mailan.


Fruta lehiaketari dagokionez, Bidaurre baserriko Kontxi Izagirrek irabazi zuen lehenengo saria. Barazki lehiaketan, berriz, Lapatza baserriko Maria Jesus Gorritxo eta Tomas Larrañagaren barazkiek eraman zuten lehenengo saria.

Baserritarren esanetan, sariak irabazteko aukera eskaintzeaz gain, Bergarako oso azoka ona da produktuak saltzeko. Badirudi oso erosle onak direla bergararrak baserritarrendako.


Bestalde, Debagoieneko V. Okela Gisatu lehiaketa jokatu zen San Martin jaietan. Handik ere iritsi zen saririk Antzuolara. Bergarako Artatse elkarteak Mikel Gomezek eta Angel Martinek irabazi zuten lehen saria; bigarrena, berriz, Antzuolako Trekütz elkarteak Gurutz Madiariagak eta Ildefonso Garciak lortu zuten.



Produktu ekologikoak ekoizten dituzte Lapatza baserrian.



Era guztietako frutak dituzte Bidaurren: sagarrak, madariak, mahatsa, pikuak...



Gurutz eta Ildefonso okela gisatua prestatzen.

KIROLA

PARTIDUAK

FUTBOLA

Irailak 25
17:00: Antzuola-Gazteak (2. erreg.)
Irailak 26
11:30: Antzuola-Aretxabaleta (Kadet.)

PILOTA

Irailak 25 (Gipuzkoako Txapelketa)
17:30: Olalde-Añorga (Gazteak)

EMAITZAK

FUTBOLA

Eibartarrak 2 Antzuola 0 (2. erreg.)
Antzuola 4 Ekintza 1 (Gazteak)
Urki 3 Antzuola 10 (Kadetek)
Antzuola 1 Urola 0 (Neskek)

PILOTA

Gipuzkoako Kluben Arteko Txap.
Olalde-Añorga (eskuz nag.) ... 8-22

LABUR

Yoga eta eskulan ikastaroetan bina talde osatuko dute

Yoga ikastaroaren kasuan, astelehen eta eguaztenetan, bi ordutegi izango ditu ikastaroak: 17:30etik 19:00etara eta 19:00etatik 20:30era. Eskulan ikastaroan, berriz, eguenetan, 14:30etik 16:00etara eta 16:00etatik 17:30era izango dira eskolak. Datorren asteko egubakoitzera arte, urriak 1, dago izena emateko aukera bi ikastaroetan.

Eskulan erakusketa, Olaran etxean

Aurreko ikasturtean eskulan ikastaroan ibilitako ikasleen lanekin, erakusketa antolatu dute egunotarako. Oraingo asteburuan, zapatuan eta domekan, izango da erakusketa hori, Olaran etxeko aretoan. Ohiko ordutegietan egongo da zabalik eskulan erakusketa: goizez, 12:00etatik 14:00etara eta arratsaldean, 18:30etik 20:00etara, hain zuzen ere.

PILOTA

Olalde elkarteak hasi dute denboraldia

Aurreko asteburuan hasi zuten denboraldi berria Olalde elkarteak pilotariak. Gipuzkoako Kluben Arteko Txapelketa jokatzeko hasi dira kadete mailakoak eta nagusiak. Ez zuten, baina, oso ondo hasi; nagusiek 22 eta 8 galdu zuten, Zumarragako Belokiren aurka. Kadeteen partidua, berriz, bertan behera geratu zen, aurkariak txapelketa lagatzea erabaki zutelako.

Oraingo asteburuan ere izango dituzte partidua; nagusiek etxean jokatu dute, Añorgaren aurka. Zapatuan izango da hori, 17:30ean. Kadeteek, berriz, Usurbilen izango dute partidua.

LAU MAILATAN DITUZTE PILOTARIAK
Olalde elkarteak lau mailako pilotariak ditu: eskuz, nagusiak, kadeteak eta infantilak; eta paletaz, nagusiak.

Eskuz, honako hauek osatzen dute nagusien taldea: Josu Agirrek, Xabier Biterik, Iban Unanuek eta Jon Gurutz Biterik. Hala ere, normalean, lehenengo biek jokatzeko dute.

Kadeteen mailan, berriz, honako pilotariak daude: Asier Longares, Aitor Mendizabal, Aitor Jauregi eta Aitzol Iturbe.

Infantil mailan, Ibai Zabalok, Jon Iturbek eta Markel Letek

dihardute. Paletaz, azkenik, honako jokalariek hauek osatzen dute taldea: Gotzon Zabalok, Iker Mansok, Gorka Iturbek eta Balendin Zabalok.

Bukatzeko, aipatzekoa da benjamin eta alebin mailako neska-mutikoen ere Olalde elkartearekin entrenatzen dutela. Bigarren mailatik aurrerako 30 bat ume ibiltzen dira, eta eskola arteko txapelketetan jarduten dute.

Parte har ezazu
Goienak eta
Espaloia Kafe Antzokiak
antolatzen duten musika lehiaketan

Estilo guztiak ditugu gustuko,
zuena ere bai!

DANBAKA

DEBAGOIENKO I. MUSIKA LEHIAKETA